

**2 TIMOTEU**  
**Pauru Nymerohpyry ropa**  
**Timoteu Neneryme**  
**2 Timóteo**  
**Ekarotopo**

Sero *2 Timoteu* tymerose Pauru a Timoteu neneryme zae aerohtoh poko, Jezu poetory amorepaneme toehse exiryke. Zurũko roropa mana toorikyry poko: “Enaromyra ase jorikyry poko, Ritonõpo maro jexiryke,” tykase. Timoteu pyno Pauru kynexine, akorehmaneme exiryke. Naeroro orẽpyra tyripõko mana soutatu samo Kyrixtu omipona, ipoetory tõ pyno ehtoh poko roropa (2 Timoteu 4.5).

Osekarõko Pauru mana: tosẽme Jezu enetuputyry poko tyya, imehnõ pyno toexiry poko te, orẽpyra toehtoh poko imehnõ amorepary poko Jezu poko. Morara exiryke Pauru typoenohse ahtao Timoteu a kure exiiko mana. “Tururume ytokety sã poremãpyra exiase. Yrohmanohpotopõpyry tõtyhkase ywy. Kuesẽkõ onenetupuhkehpyra exiase. Naeroro Ritonõpo nekarory kurã jeraximãko mana, kure jehtopõpyry epehpyryme. Moro ekarõko mã Kuesẽkõ ya ekarotoh po toehse ahtao,” tykase Pauru (2 Timoteu 4.7-8).

**Sero pape ao**

Osekarotopo 1.1-2

Omi kurã Jezu poko ekarory 1.3–2.26

Jezu oehsasaka ahtao 3.1-9

Enaroximatoh, tuaro ehtopo 3.10–4.8  
 Typoko ehtopo 4.9-18  
 Aosekazumatoh etyhpyryme 4.19-22

<sup>1</sup> Ywy ase Pauru Jezu Kyrixtu nenyokyhpyry. Pake ynara tykase Ritonõpo: “Kure rokẽ oritorỹko ase, jũme orihpyra oehtohkõme Jezu Kyrixtu maro,” tykase ynororo pake. Morara exiryke tonyohse ywy imehnõ amorepatohme.

<sup>2</sup> Ynymerohpyry moro oneneryme Timoteu. Umũkuru kurãme mase Jezu Kyrixtu enetuputyryke oya oesẽme.

Ynara ãko ase Kumykomo a Ritonõpo a: “Kure rokẽ Timoteu tyriko, ipyno ke exiko, torẽtyke pyra tyriko,” ãko ase. Morara ãko ase roropa Kuesẽkomo a, Jezu Kyrixtu a.

*Kure mase Ritonõpo, katopõpyry*

<sup>3</sup> Kokoro rokẽ oturũko ase opoko Ritonõpo netyryme. Ynara ãko ase: “Kure mase Papa, Timoteu pyno oexiryke,” ãko ase koko, saereme, enara. Ritonõpo poko ase. Yyrypyry poko pyra ase, tuaro ase. Tam tõ tyrypyrykõ poko pyra toh kynexine tuaro toexirykõke. Mokaro ehtopõpyry sã ase.

<sup>4</sup> Wenikehpyra jexiryke oxitatopõpyry poko, omuhpe oehtopõpyry poko roropa, oenery se ropa ase ipunaka, tãkye nymyry jehtohme.

<sup>5</sup> Jezu enetupuhnõko mase oesẽme nymyry. Osenekunohpyra mase. Moro waro ase. Osemazuhme onoty a, Roiti a Jezu tonetupuhse. Asa a roropa tonetupuhse, Eunixi a. Seromaroro oya tonetupuhse rahkene.

<sup>6</sup> Morara exiryke pape merõko ase oneneryme wenikehpyra oehtohme, mãsa rokẽ pyra

oehtohme, imehnõ amoreparý poko. Ouhpona jemary tyrise ahtao ya, Ritonõpo a Tuzenu tokarose oya imehnõ amorepatohme oya.

<sup>7</sup> Tuzenu ekarone kyya xine, oserehpyra kuehtohkõme, orẽpyra kuehtohkõme, imehnõ pyno kuehtohkõme, zae ehtoh riry waro kuehtohkõme, enara.

<sup>8</sup> Morara exiryke ehxiropyra exiko õtururuhtao imehnõ maro Jezu poko, Kuesõkõ poko. Ehxiropyra exiko roropa ypoko. Jezu poetoryme jexiryke japuruase toto. Ysaaro ke exiko. Ynara kaxiko: “Jezu poko imehnõ amoreparý se ase. Imehnomo a jutuarimaporyhtao eanahtõko ase,” kaxiko. Mame otuarimaporyhtao åkorehmåko Ritonõpo mana eanahtotohme oya.

<sup>9</sup> Kukuråkatone. Kueahmatone roropa typoetoryme kuehtohkõme. Kynyrihpyrykõ kurå pokoino pyra, typoe rokẽ kueahmatone kure kyrirykõ se toexiryke. Toenupunase kypoko xine toexiryke Tumåkuru Jezu Kyrixtu enehpory se kynexine kukuråkanekõme, moino ro sero nono onyripyra ro tahtao.

<sup>10</sup> Seromaroro Ritonõpo kure toexiry tonepose kyya xine kukuråkanekõ oepyryke, Jezu Kyrixtu oepyryke. Kuorikyrykõ tonahkapose Jezu a, jũme orihpyra kuehtohkõme, enetuputyryhtao kyya xine. Moro poko tuaro sytatose Jezu enetuputyryke kyya xine.

<sup>11</sup> Imehnomo a roropa Jezu enetupuhpotohme tymenekase ywy Ritonõpo a, ipoko toto zurutohme. Ritonõpo nenyokyhpyryme roropa ase, imehnõ amorepatohme, juteutõkara roropa amorepatohme.

12 Morara exiryke etuarimãko ase. Yrome ase ehxiropyra, Jezu waro jexiryke. Ukurãkaneme enetupuhne. “Jesẽme mase,” akẽ eya. Morara karyke ya osekarone eya ipoetoryme jehtohme. Jewomaneme mana tooepyry ropa ponãmero kapu ae. Moro waro ase.

13 Ritonõpo omiry ekaroryhtao ya otato mexiase. Zae rokẽ oturuase oya. Moro omipona rokẽ exiko imehnõ amorepatohme oya ysaaro. Jezu enetupuhneme oexiryke aomipona rokẽ exiko. Imehnõ pyno ke exiko. Morara sehtone Jezu Kyrixtu poetoryme kuexirykõke.

14 Ritonõpo a tõmiry tokarose oya, otato oehtohme, etyorõmapopyra imehnomo a oehtohme, zae rokẽ imehnõ amorepatohme oya. Ritonõpo omiry poko awahtao Zuzenu ãkorehmãko mana. Kukurohtao xine mana Ritonõpo Zuzenu.

15 Mokaro Azia põkõ urumekase ropa. Toto a urumekary waro mase, Pixeru, Eremojene, imehnõ maro urumekahpõkõ mokaro.

16 Yrome Onexiporu jakorehmane itamurume. Morara exiryke ynara ãko ase Ritonõpo a: “Onexiporu tõ pyno exiko,” ãko ase, jakorehmaneme aexiryke. Ehxiropyra roropa monexiã ymyhtoh poko.

17 Roma pona tooehse tahtao jupiase pohto rokẽ pyra, jenery ponãmero.

18 Morara exiryke ynara ãko ase Ritonõpo a: “Onexiporu pyno exiko yna Esẽ oepyry ropa ahtao kapu ae,” ãko ase, takorehmase eya jexiryke Epezu po jahtao. Moro waro mase.

## 2

### *Soutatu sã Kuesêkõ omipona kuexirykõ poko*

<sup>1</sup> Morara exiryke aimo orẽpyra exiko. Jezu Kyrixtu ãkorehmãko mana, kypyno xine toexiryke.

<sup>2</sup> Ynekarohpyry oya Jezu poko metase imehnõ netaryme. Tuhkãkõ netaryme ynekarohpyry metase. Moro ynekarohpyry ekaroko ropa orutua komo a, Ritonõpo omipona exiketomo a, imehnõ amorepananõme toto ehtohme.

<sup>3</sup> Oseanahtoko otuarimaporyhtao imehnomo a ysaaro, soutatu sã roropa, Jezu Kyrixtu poetoryme oexiryke.

<sup>4</sup> Etonatoh konõto toehse ahtao, soutatu tõ xiaxiake ytopyra mã toto, emero irumekãko tosêkõ omipona rokẽ toehtohkõme. Mokaro saaro kymarokomo. Torẽtyke pyra sehtone tineru apoiry poko, mõkomo apoiry poko roropa, Kuesêkõ omipona rokẽ kuehtohkõme tãkye aehtohme kypoko xine.

<sup>5</sup> Morararo orutua kõ atatapoiryhtao imehxo exikety waro ehtohme, tosêkõ omipona rokẽ ahtao: “Imehxo mokyro mana,” ãko mã toto ipoko. Tosêkõ omipona pyra ahtao: “Imehxo mokyro,” kara mã toto ipoko.

<sup>6</sup> Kure tutupi poko erohkety osemazuhme tỹkyryry epery enahnõko, tarykase eya exiryke. Imeĩpo tỹkyryry ekamõko mana imehnomo a.

<sup>7</sup> Moro poko osetupuhko, ynymeroypyry poko. Morarame Kuesêkõ otuarõtanoohnõko mã rahkene, moro poko oepohnopyryhtao.

<sup>8</sup> Wenikehpyra ke exiko Jezu Kyrixtu poko. Mokyro rokẽ tõsemãkapose ropa aorihxĩpo. Tawi

ekepyry parÿpyryme mana. Morara ãko ase Jezu poko imehnõ amoreparyhtao.

<sup>9</sup> Moro pokoino etuarimãko ase. Jezu omiry ekaroryke ya popÿ sã tõmapose ywy ãpuruhpyry taka. Yrome Ritonõpo omiry anapurupyra mã toto.

<sup>10</sup> Morara exiryke eanahtõko rokẽ ase. Utuarimaryhtao eanahtõko ase, Ritonõpo nymenekatyã kurãkatohme, kysã toto ehtohme. Kukurãkatorÿko Ritonõpo mana Jezu Kyrixtu poetoryme kuexirykõke. Kure rokẽ exïko sytatose orihpÿme.

<sup>11</sup> Ynara katopõpyry zae nase:

“Imaro kuorikyrykohtao,  
imaro orihpÿme exïko sytatose.

<sup>12</sup> Imaro kuetuarimarykohtao,  
imaro tuisame exïko roropa sytatose.

Yrome: ‘Jezu waro pyra ase,’  
karyhtao kyya xine:

‘Mose waro pyra ase,’ ãko roropa Jezu mana ky-poko xine.

<sup>13</sup> Ajohpe kuahtao xine,  
ajohpe pyra ro Jezu mana,  
amonohkara mana zae rokẽ toexiry poko.

Ynara kara mana: ‘Moky saaro ajohpe exïko ase,’  
kara Jezu, ajohpãkarame aexiryke.”

*“Kure mase ya,” ãko Ritonõpo aomipona exike-tomo a*

<sup>14</sup> Moro katopõpyry kure. Jezu poetory tõ moro poko toto onuenikehkapopyra exiko. Amorepako toto. Ynara kaxiko eya xine Kuesẽkõ netaryme:

“Oseosezuhpyra ke ehtoko omi poko. Oseosezuhnohtao popyra mana. Imehnõ akorekehkãko rokẽ mana,” kaxiko eya xine.

<sup>15</sup> Akĩme pyra erohko Ritonõpo omipona oehtohme, “Kure mase,” katohme Ritonõpo a oya. Azahkuru pyra exiko ehxiropyra oehtohme oerokuru poko. Zae rokẽ imehnõ amorepako Ritonõpo omiry poko.

<sup>16</sup> Ritonõpo waro pyra exiketõ omiry poko pyra exiko, Ritonõpo zamaro pyra toto omiry exiryke. Mokaro omiry etananõ mã iirypyrymehxo exĩko toh mana.

<sup>17</sup> Ahno pũ toeposohkase ahtao motapitõko mana jõtopyra exiryke. Moro saaro mokaro omiry, emãnõko mana imehnõ ryhmãko samo. Asakoro mokaro amorepananõ mana Imeneu, Piretu, enara.

<sup>18</sup> Ritonõpo omiry turumekase eya xine. Ynara ãko toh mã repe: “Aorihtyã tõsemãkakehse Ritonõpo a,” ãko toto, ajohpe rokene. Toitoine azahkuru exikety etaryke tyya xine, osenekunohnõko mã toto. Jezu omipona hkopyra exĩko mã toto.

<sup>19</sup> Yrome Ritonõpo nukurãkatyã onyryhmara mana. Ynara tymerose exiryke Ritonõpo omiry: “Kuesẽkõ typoetory tõ waro mana,” me tymerose. Ynara roropa tymerose: “Kuesẽkõ poetoryme kuahtao xine kyyrypyrykõ rumekãko sytatose,” me tymerose roropa.

<sup>20</sup> Imehxo exiketõ tapyĩ tao oripo tõkehko nae. Typyne exikety nae, uuru risemy, parata risẽ roropa. Typyne pyra exiketõ nae roropa, wewe risemy te, orino apuhsẽ tõkehko, kurãkõ ãme nae,

emero rokẽ ěme nae, enara.

21 Oripo saaro sytatose. Kyyrypyrykõ rumekaryhtao kyya xine, tukurikase roropa kuahtao xine oripo kurã sã sytatose, tyyne exiketõ samo. Kyyrypyrykõ poko pyra exiiko sytatose, Kuesẽkõ poetoryme. Kuesẽkõ omi poe kure rokẽ exiiko sytatose. Kure tyriry poko rokene.

22 Nuasemãkõ otarame tyyrypyrykõ poko penetãko mã toto. Ipenetarykõ poko pyra exiko. Ynara rokẽ exiko, zae ehtoh poko rokẽ exiko, Jezu enetuputyry poko, imehnõ pyno oexiry poko, kure rokẽ oexiry poko, enara. Moro saaro Ritonõpo maro oturuketomo, kure rokẽ toexirykõ poko toto. Tyyrypyry poko pyra toto ipunaka tukurohtao xine.

23 Yrome imehnõ omiry ãkorehmara mana Ritonõpo onenetupuhpyra aexirykõke. Okynahtao oxiehno imehnõ riko aomirykõ mana. Morara exiryke toto omiry onetara exiko.

24 Jezu poetoryme oexiryke imehnõ zehno pyra exiko. Toto pyno exiko tuaro exikety samo, kure rokẽ toto amorepako, penekehpyra roropa exiko toto amorepary poko. Emÿpopyra exiko.

25 Imehnõ amoreparyhtao kuomirykõ omipona pyra toto ahtao toto pyno ro sehtone. Otarãme imeiipo iiryryryme toexirykõ enetupuhnõko mã toto Ritonõpo poe. Otarãme tyyrypyrykõ rumekãko ropa toto Jezu omipona toehtohkõme.

26 Otarãme eramãko ropa toh mana joroko tamuru winoino. Inapurutoh tae tütãko ropa toh mana. Otarame omi kurã omipona pyra aehtyã ekurãkãko ropa toh mana Ritonõpo poe, enara.



### 3

#### *Jezu oehsasaka ahtao*

<sup>1</sup> Tuaro ehtoko, Jezu oehsasaka ahtao tuhke ehtomaketō exīko mana, Jezu omipona exiketō poremākapory se exiketomo.

<sup>2</sup> Mokaro osepyno rokē exiketomo. Imehnō mōkomory poko penetāko mā toto. Osenetaonohnōko rokē mā toto. Ritonōpo kerekeremāko mā toto, tumykō omipona pyra exiketomo. Tŷkyryrykō tokarose ahtao eya xine, “Kure mase,” kara mā toto, Ritonōpo a omipona pyra roropa mā toto.

<sup>3</sup> Sekerereme pyra exiketō mokaro, otupokapopyra exiketomo. Imehnō kerekerem-ananomo ajoajohpākomo, zehnotokomo, kurākō se pyra exiketomo.

<sup>4</sup> Tope tō ewokananomo, tomeseke pyra exiketomo, osenetaonohketomo, typenetatoh poko rokē exiketomo, Ritonōpo pyno pyra exiketomo.

<sup>5</sup> “Ritonōpo poetoryme ynanase,” āko toh mā repe. Yrome Ritonōpo jamitunuru ripory se pyra mā toto tukurohtaka xine. Naeroro mokaro maro pyra ehtoko isā oexirykōino.

<sup>6</sup> Toitoino mokaro zae pyra imehnō amorepāko mā toto. Imehnō tapyī taka omōnōko mā toto, nohpo tō omipohtomase. “Jomipona awahtao xine, ytopyra matose apoto konōto htaka,” āko toh mā repe. Mame ataomipohtomapōko mā toto. “Iiryryryme ase,” āko rokē mā toto, yrome tyryryry rumekary se pyra mā toto.

<sup>7</sup> Atamorepakehpyra toh mā repe. Yrome zae omi exiry onenetupusaromepyra mā toto.

8 Pake Janexi tō tōxienonohse Moeze maro, Janexi, Jāpyrexī, enara toh kynexine. Zae Moeze omiry kynexine. Yrome zae omi etary se pyra toh kynexine. Zae omi etapory se pyra roropa toh kynexine. Mokaro saaro serōkomo. Zae pyra imehnō amorepāko mā toto zae omipona toexirykō se pyra mā toto. Tukurohtao xine azahkuru rokē osenetupuhnōko mā toto. Jezu poetory poenohnōko rokē mā toto. Yrome Ritonōpo omipona pyra ekurehnōko mā toto.

9 Myarotokoro pyra mā toto. Azahkuru toto exiry enēko imehnō emero, pake Janes tō azahkuru ehtopōpyry samo Jāpyrexī maro.

*Pauru namorepatopōpyry etyhpyry*

10 Yrome ya imehnō amorepatopōpyry waro toehse mase. Kure jehtopōpyry waro roropa mase. Ritonōpo omipona se jehtopōpyry waro mase, Ritonōpo enetupuhtopōpyry ya, sekerereme jehtopōpyry, imehnō pyno jehtopōpyry, yyryhmary eanahtotopōpyry ya,

11 jyhtomatopōpyry, enara. Toetuarimase ywy itamurume Ātiokia po jahtao, Ikoniū po, Rixityra po, enara. Yrome jyhtomaryhtao, ypynanopyase Kuesēkomo.

12 Morararo emero Jezu Kyrixtu omipona se exiketomo. Imaro se exiketō osanumāko mā toto aomipona se toto exiryke.

13 Yrome iirypyrymākō popyrahxo exīko mana, onekunohtōkō roropa. Imehnō enekunohnōko mā toto. Osenekunohpōko roropa joroko tamuru a toto.

14 Yrome tyoro mase. Zae ehtoh poko tātamorepase oya, Jezu Kyrixtu poko tonetupuhse

roropa oya okurohtao, moro onurumekara exiko ipunaka. ãmorepahpõkõ waro mase, asa, onoty, ywy, enara.

<sup>15</sup> Opoetoae ro kurã poko ãtamorepahpyry mase. Pape kurãme exiryke kutuarõtanohtorÿko mana, Ritonõpo a typoetoryme kyrirykõ poko, Jezu Kyrixtu tonetupuhse kyya xine ahtao.

<sup>16</sup> Tõmiry tymeropose urutõ komo a Ritonõpo Zuzenu omi poe, zae kuamorepapotohkõme, iirypyrymãkõ mynyhmapotohme, azahkuru exiketõ kurãkatohme, kuamorepatohkõme kure ehtoh poko kuehtohkõme.

<sup>17</sup> Tõmiry tymeropose eya typoetory tõ tuaro ehtohme tymõkomoke exiketõ sã kuehtohkõme roropa kure ehtoh poko zuaro kuehtohkõme imehnõ akorehmary waro roropa kuehtohkõme.

## 4

<sup>1</sup> Jezu oehnõko mana kutuisarykomo. Tooehse ahtao sero nono põkõ apiakãko mana, emero aorihityamo, orihpynomo, enara. Ynara oururu se ase Ritonõpo netaryme, Jezu Kyrixtu Kuesëkõ netaryme roropa:

<sup>2</sup> Ritonõpo omiry ekaroko imehnõ netaryme. Ekurehpyra exiko. Jezu apoiry se toto ahtao, amorepako toto. Apoiry se hkopyra toto ahtao aomiry ekaroko rokẽ toto netaryme. Pohnõ zuruko tyrypyrykõ poko pyra toto ehtohme. ãkyemapoko toto. Amorepako toto Ritonõpo omiry poko. Penekehpyra ke exiko roropa toto amorepary poko.

<sup>3</sup> Imeĩpo zae omi etary se pyra exiko mã toto sero nono põkomo, typenetatohkõ poko

rokē toehtočkōme. Ajohpākō menekāko mā toto tamorepanekōme, tyyrypyrykō poko rokē tamorepatohkōme.

<sup>4</sup> Zae omi rumekāko mā toto ajoajohpākō omiry rokē etatohme tyya xine.

<sup>5</sup> Naeroro mokaro sã pyra exiko. Tuaro exiko. Oetuarimaryhtao eanahtoko rokene. Imehnõ zuruko Jezu Kyrixtu poko. Orēpyra exiko Ritonõpo omipona. Imehnõ akorehmako roropa aomipona toto ehtohme.

<sup>6</sup> Okyna hkopyra jorihtoh toehse nase. Yrome torētyke pyra ase jorikyry poko.

<sup>7-8</sup> Tururume ytoketõ ahtao, toiro osemazuhme eporehkāko. Epehpyry apoïko mana, tosēkõ omipona ahtao rokene, osema etyhyryry pona toeporehkase ahtao roropa. Mokaro sã ywy. Poremāpyra exiase. Yrohmanohpotopōpyry poko tōtyhkase ywy. Kuesēkõ onenetupuhkehpyra ase. Naeroro Ritonõpo nekarory kurã jeraximāko mana, kure jehtopōpyry epehpyryme. Moro ekarōko mā Kuesēkõ ya ekarotoh po toehse ahtao. Imehnomo a roropa, emero Kuesēkõ pyno exiketomo a moro ekarōko roropa mana, aepyry ropa eraximananomo a.

### *Pauru nurutopōpyry*

<sup>9</sup> Timoteu, axĩ sahxo õpokonopyry aotyhkanohko, oehtohme xiaro ya.

<sup>10</sup> Turumekase Temaxi a jexiryke morara āko ase. Mōkomo poko typenetaryke toytose ynororo Tesaronika pona. Kyresēte toytose roropa Karaxia pona. Titu toytose Taumaxia pona, enara.

<sup>11</sup> Ruka rokē taro nase ymaro. Maku menehtase amaro oehtozome, jakorehmaneme aehtohme taro.

<sup>12</sup> Tikiku aropone Epezu pona.

<sup>13</sup> Ooepyryhtao jupō enehko. Tyroa po Kapo tapyī tao ynomoase. Moro enehko. Ypapē ro-ropa enehko. Okyno pihpyry risē roropa enehko, imeroypyry. Moro se nymyry ase.

<sup>14</sup> Arexātere, mokyro kurimene poko erohkety, popŷ mokyro yhtomane. Apo Kuesēkō mokyro wānohno iiryryryme aexiryro.

<sup>15</sup> Akorekehkatō mokyro nexiase Ritonōpo omiry ekaroryhtao yna a. Tōsezusezuhse itamurume ynororo yna maro. Mokyro waro exiko oryhmaryino roropa.

<sup>16</sup> Apitoryme terekatu ēpataka toehse jahtao josewomatohme, jurumekase toto emero. Yrome ynara āko ase Ritonōpo a ipoko xine: “Papa, mokaro onuānohpyra exiko toto nyrihpyry poko,” āko ase.

<sup>17</sup> Yrome Kuesēkō jurumekara ymaro monexi-ano. Yjamihtanopyase Jezu Kyrixtu poko ekarotohme juteutōkara a. Typynanohse Kuesēkomo a jexiryke jeatāpyra toh kynexine.

<sup>18</sup> Kuesēkō ypynanohnōko mana yyryhmaryhtao pohno mo a. Mame orēpyra tosaka jarōko mana. Moero mā emero esēme mā ynororo. “Kure Ritonōpo mana, kakehpyra sehtone.” Morara kary kure mana.

*“Murutase toto,” katopōpyry*

<sup>19</sup> Murutase toto Pirixira, Akira, Onexiporu tō roropa, enara.

<sup>20</sup> “Pauru opyno xine,” kaxiko eya xine. Eraxitu tōsesarise Korĩtu po, Tyropimu ynomoase Miretu po, kure pyra exiryke.

<sup>21</sup> Axĩ sahxo moehtase ropa konopotara ro ahta.

“Kuurupotase Timoteu a,” ãko Eupuru mana, Purutēte te, Rino te, Kyrautia te, emero Jezu poetory tō maro. “Opyno ynanase, Timoteu,” ãko toh mana.

<sup>22</sup> Ynara ãko ase Kuesēkomo a Jezu Kyrixtu a: “Timoteu maro exiko. Ipyno exiko,” ãko ase, enara rokene.

[]  
**Khmer Standard Version of the Holy Bible in  
the Khmer Language of Cambodia**

Copyright © 1997, 2005 The Bible Society in Cambodia

[]

© រក្សាសិទ្ធិដោយសមាគមព្រះគម្ពីរសកល

គ្រប់ ផ្នែក នៃ សៀវភៅ នេះ មិន ត្រូវ បាន ផលិត ឬ ប្រើប្រាស់ តាម ទំរង់ ឬ មធ្យោបាយ បែប អេឡិចត្រូនិក ឬ ម៉ាស៊ីន ណាមួយ រួម ទាំង ការ ថត ចម្លង អាត់ សំលេង ផ្ទុក នូវ ទិន្នន័យ ប្រព័ន្ធ ណាមួយដែលអាចយកមកប្រើ ដោយគ្មានការអនុញ្ញាតពីសមាគមព្រះគម្ពីរកម្ពុជា។ ប្រសិនបើ មានការដកស្រង់អត្ថបទគម្ពីរចាប់ពី ១០០០ខ ឡើងទៅ ត្រូវសុំការអនុញ្ញាតពីសមាគមព្រះគម្ពីរ កម្ពុជា

Quotations of the Bible in Khmer Standard Version in any form, must obtain written permission from the Bible Society in Cambodia if the quoted material is inclusive of at least 1,000 verses, or a copy of any book wholly or partially, which amounts to 50% of the book quoted. For any long quotation, notice of copyright must appear as follows: Text copyright © 1997, 2005 United Bible Societies. Used by permission.

---

PDF generated using Haiola and XeLaTeX on 25 Apr 2025 from source files dated 26 Apr 2025  
fc9611d4-b5f2-5730-b6c2-58f2658eac89